



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 7

Yangia anidakangma :



Tir Yimiyim



tir_yimiyim



tir yimiyim

TAPAK 8

Iran kubok Kurdistan tesem nung nisung 110 dak tema tepset

Abrar alizükba atema Sunrisers Leeds pur taitsüba aika ajangshidar



VOL. XXIII ISSUE NO. 151 (ADOK 151) DIMAPUR AMUNGNÜ (SNDAY) METSÜREMI (MARCH) 15, 2026

₹ 5.00

MP Supongmeren-i Foothills Road atema jembii

Dimapur, March 14, 2026 (TYO): MP S. Supongmeren Jamir-i Centre sorkar dang Foothills Road (Trans-Nagaland Highway) mulunga agizüksü aser yanglutsü ayongzükogo.

Lok Sabha nung Rule 377 kubok Supongmeren-i iba onük benoka jembio.

Foothills Road ya kilometer 395 shi lir aser Assam den arstsüa aliba tenemtsünglen yangluba ajanga Nagaland kubok district tem tsüngda senzisenbong nung mapang tajemba agitsü. Iba lenmang ajanga Nagaland nung alirtemi tanga state mesüitsü aser connectivity o administrative maparen tajungba akümtsü nükjindong lir.

Iba lenmang yangluba ajanga jila aser yimtsüng 103 sendakteptsü aser Nagaland nung nisung lakh 11 tema ajangzüksü. Iba highway ajanga meta talang pilar aliba district temi National Highways aser state roads den sendakteptsü aser rongsenketzüng, shishilembaba aser terenlok atema maongka aika angutsü.

Foothills Road ajanga Peren, Chumoukedima, Dimapur,

Niuland, Wokha, Mokochung, Longleng, aser Mon district tem süitsü. Ali rongsen jenti alidak süiba den mapang talangka connectivity nung timtem ajurua aruba tesemtem Foothills Road ajanga sendakteptsü.

Dimapur nungi Tuli (kilometer 180.656) tashi Phase-I (Package I-VI) atema Detailed Project Reports (DPRs) ka Road transport and Highways Minister ket nung agütsüogo aser iba ya Rs. 3,284.06 crore atema lir aser National Highway ama agizüksü asüngdanga lir ta MP Supongmeren-i ashi.

Foothills Road mapatong ajunga atema Rs. 9,000 crore shi endoktsü ta asadangteta lir ta paisa shisem.

India sorkari iba mapatong agizüksü aser Nagaland nung alirtemi taginüba angateta mulunga agizüksü ayongzükger, Foothills Road ya Nagaland nung alirtemi mapang talangka nungi aginüa aruba mapatong ka lir aser iba lenmang ajanga connectivity akangshitsü, rongsenketzüng renloktsü aser state nung district balala sendakteptsü ta Supongmeren-isa metetdaksü.

NMA-i Covid mapang shimokertem atema ola adoker

Dimapur, March 11, 2026 (TYO): Naga Mothers' Association (NMA)-i Chief Minister Neiphiu Rio dang Covid mapang shimokba healthcare workers ken o timi tangatettep kati arutsü mepishia metetdaksüogo.

Joint Action Committee Covid Era Appointed Healthcare Workers nungi NMA dangi iba tebilemtsü atema temepishiba shidi ka aruogo ta parnoki ashi.

Iba JAC nung Nagaland kubok district Hospital, CHC aser PHC balala nungi Doctor, Nurse, Dentist aser Laboratory Technician tem dena lir ta NMA-i CM Rio dang ashi.

State sorkari December 16, 2025 nü Covid-19 wara mapang shimokba Medical Officer 97 regularize asüba metetdaksü. Ajisüaka Naga Students

Federation-i ashishitepba ajanga iba regularization order sota lir ta NMA-isa ashi.

NSF-i state sorkar dang mapa 280 Nagaland Public Service Commission (NPSC) aser Nagaland Staff Selection Board (NSSB) ket nung agütsütsü akhanger. Parnokisa Covid-19 mapang shimokertem nem grace marks aser one time age relaxation agütsütsü shiogo ta NMA-isa metetdaksü.

February 3, 2026 nü Cabinet-i regularize asüba sota atatsü aser NSF den olemteptsü atema High Power Committee (HPC) ka tentetogo.

NSF-i Naga lanurtem atema noktaker aser NPSC o NSSB ajanga recruitment maparen inyakdaksünür. Ajisüaka Covid-19 wara ajanga Nagaland densema linük ajungalen health

emergency ka adok aser ibaji atema Open Advertisement ajanga nisungtem shimoktsüsa aküm. Iba jagi state sorkari Special Recruitment Drive (SRD) aser regularization mapa inyakogo ta NMA-isa ashi.

"High Court aser Supreme Court ajanga state sorkar nem tetuyubatem agütsüogo. Covid wara mapang Frontline workers-i shilem tajung agiba atema tenüngsang agütsür aser tang tebilemtsü ajurua aliba ya bangdak Department aser state sorkar ajanga lir anungji iba ken o timi angatetteptsü atema nai mapa inyaktsü ayongzükger" ta NMA-i Chief Minister dang ashi.

NMA-isa High Power Committee (HPC) dang tekaratiba nung timi tebilemba ashitsü mepishia metetdaksüogo.

Mao Council-i Manipur Deputy CM Dr Losii Dikho nem tenüngsang agütsü



Imphal, March 14, 2026 (Agencies): Mao Council-i March 14, 2026 nü Manipur Deputy Chief Minister aser PHED, Forest, Environment & Climate Change Minister Dr. Losii Dikho nem tenüngsang agütsüogo.

Tadubi Secretariat Complex nung sentong agidang Mao Council President N. Athikho Joseph-i Dikho nem tenüngsang agüja jembii.

Deputy Chief Minister shimba atema pelar aser pai yimjung bener arutsü aser tensa süngjemtsü atema state kubok tesem balala sema senzüba atema tenüngsang agütsür ta Mao Council President-i ashi.

Iba sentong ya Dikho-i district aser state asoshi shilem

tajung agiba atema tenüngsang agütsüba mapang ka lir. Pa nem shisatsü aser arishi meshia sarasademtsür ta Joseph-isa ashi.

"Mao nunger, kaketshirtem aser telok balalai pusema nungitba atema kanga pelar. Ni Deputy Chief Minister shimba ya nenok sarasadem ajanga lir aser sorkari Manipur nung ajak renloktsü aser yimjung bener arutsü atema tenangzükba lir" ta Dr Losii Dikho-ia o jembidang ashi.

Iba sentong nung Mao Baptist Churches Association (MBCA) Executive Secretary Rev. A. Pfokrelo-i nüngshilung sayatsü.

Dimapur, Kohima, Senapati aser tanga tesemtem nungi Mao Council unit balala ketdangsurtem iba sentong nung aden.

Nagaland nung domestic LPG peria lir; petsaprong masütsüla

Dimapur, March 14, 2026 (TYO): Nagaland nung domestic LPG peria dang lir anungji nübortemi petsaprong masütsü aser nungdak maliba nung LPG alidena mayutsü ayongzükger ta state sorkari metetdaksüogo.

Nagaland nung LPG aser tanga petroleum products asadanga senden ka amenba sülen sorkari iba osang metetdaksüogo.

March 13, 2026 nü iba

senden amendang Kohima, Dimapur aser Chümoukedima nungi deputy commissioner tem aden. Senden nungsa Food and Civil Supplies Department ketdangsurtem aser oil marketing companies nungi teshimtet nübotem aden.

Parnoki stock status meyipa repringshiba sülen domestic LPG stock peria lir ta Department-i ashi.

Ketdangsurtemi distributors, retailers aser kijatem dang black

marketing, jenjang tur ayokba mesüra ozüng alema domestic LPG ayokba inyakyimtem ozüng kubok merenshitsu ta kümdangtsü shiogo.

Parnokisa public dang digital booking system ajanga domestic LPG cylinders book asütsü aser Delivery Authentication Code (DAC) system ajanga delivery asütsü ta nenshiogo.

LPG alidena mayutsü atema anogo 25 sülen ang refill booking sütettsü ta parnokisa ashi.

Nagaland nung tanü tashi tzünglu arutsü: NSDMA

Dimapur, March 14, 2026 (TYO): Nagaland nung March 15 tashi tsüngsang majungtsü aser tzünglu arutsü aser district kar nungbo tzünglu kanga arutsü ta Nagaland State Disaster Management Authority (NSDMA)-i metetdaksüogo.

Dimapur, Kohima, Wokha,

Mokokchung, Longleng, Mon, Zunheboto, Tuensang, Peren, aser Phek nung tzünglu arutsü akok ta NSDMA-isa ashi.

Maneni, Longleng, Mokokchung, aser Wokha district tem nung tzünglu terara arutsü ta parnokisa shisem.

Kasa mapang Kohima,

Mokokchung, Mon, Tuensang, Peren, aser Noklak district tem nung tzünglu arutsü ta parnokisa metetdaksüogo.

NSDMA-isa district disaster management ketdangsurtem aser tanga line department tem dang jeretperaa alitsü tetuyuba agütsüogo.

NSF-i 'Vande Mataram' anema public rally ayongzükger

Dimapur, March 14, 2026 (TYO): Ministry of Home Affairs (MHA)-i Vande Mataram atentsü tetuyuba agütsüba anema Naga Students' Federation (NSF)-i March 16, 2026 nü Kohima nung public rally ka alitsü ayongzükger.

Iba sentong ya anepdang 10:00 ako nung Old MLA Hostel Junction nungi tenzüksü aser Lok Bhavan tashi aotsü.

Nagaland Governor ajanga India Tir dangi Naga nunger tebilemba aser takhangbatem indang memorandum ka agütsütsü ta NSF-i

metetdaksüogo.

MHA-i January 28 nü national song Vande Mataram atentsü sangdong ka agütsütsü tuyuba anema iba lungkak aitba sentong agitsü ta parnokisa ashi.

Naga nungeri linük ajak indang national songs aser symbols akhümtsübur, ajisüaka Vande Mataram tendaksüba atema tebilemtsü abener kechiyong iba ken nung tamangba yimsü aser tekülem indang kenjang dena lir aser itemji Nagaland nung alir aikati magizükger ta NSF-isa metetdaksüogo.

Naga lima nung alemli nungi tamangba yimsü aser kin balala külemi putepa dang liyonga arur aser kati kati akhümtsübutepa arur. Maneni shisaliok rejutem ya tangazükdak dang asütsüla aser kaketshirtem nem tashiyim agi inyaksangshi mesüdaksütsüla ta NSF-isa ashi.

Kohima nung public rally agiba anogo nung Naga nunger aliba tesem ajak nung pei pei sasep lungkak aitba sentongtem ayongzükger agitsü units aser subordinate organisations ajak nem tetuyuba agütsür ta NSF-isa metetdaksüogo.

Ao Nurses Telongjem silver jubilee mungogo



Dimapur, Metsüremi/March 14 (TYO): Ao Nurses Telongjem, District Hospital Dimapur (DHD) pur Honibarnü Town Hall Dimapur nung silver jubilee mungogo. Iba jubilee ya "Kümküshidi" omen nung ajemdaker mungogo.

Sentong nung o jembiba mapang Advisor for Labour & Employment, Skill Development & Entrepreneurship, Excise, Nagaland Moatoshi Longkumer-i, iba benjungmung ya küm 25 tashi temeim taochi sayuba, tangar asoshi pei taküm bendanga agütsüba aser meimchir tenzükbba benjung ka lir, ta ashi.

Advisor-isa, anogoshia ainer ka anepalua alitsü shimba takümüji tangar dang nungi balaka lir, ta ashi. Meimchi tenzüksü atema asen taküm bendanga agütsüsüji mapang

temala masü, ta pai ashi. Maneni pai nurse tem dang taküm kümzüksü atema tali bendanga agütsüshitsü ajungshi, ajita asünungdang meimchir maneni ajanzüksü, ta ashi.

Sentong nungsa Medical Superintendent, DHD, Dr. George Thirah-i, mozükidang Ao tsür nurse temi koda tongtibang shilem agir iba indang lemsatop, kechiyong mozükidang nurse shilem 80 shibo Ao tsür lir ta ashi. Paisa, mozüki maneni renloka yoküsü atema healthcare worker tejentem dang lanur nurse tem anitetsü ayongzüka liasü.

George-i, mozüki ka nung nurse tem ya tongtoret lir ta ashiba den, teamwork koda tongtibang iba indang lemsatop aser tajangshiba aika bener aliba nurse tem dang nurse tasentem dang lensayutsü

mepeshi, ajita asünungdang staff tasentemi parnok tajangshiba nungi angazükttetsü, ta ashi.

Maneni pai nurse tejentem dang kümtem tsüngda parnoki angazükba nursing indang "golden rules" tem lanur nurse tem nem belenzüka agütsüsü ajungshi, aji ta asünung dang tesüiba mapang tenzükertemi tenzüka toktsüba mapa tajung maneni tejakdangi bener otettsü, ta shisem.

Sentong nung Deputy Director Nursing (Retd), M Ayangla Walling-i jubilee mung onük "Kümküshidi" nung ajemdaker jembiba aser DMC Councillor, R Chubala aser Nursing Superintendent (Retd) J Ayangla natia o tatsütsü jembiba liasü. Sentong nungsa mapa nungi anener aliba nurse temi ken tajung ka aten.

Jubilee Memorial College nung digital awareness camp agiogo



Dimapur, Metsüremi/March 14 (TYO): State Bank of India (SBI), Regional Business Office Mokokchung aser Department of Economics, Jubilee Memorial College (JMC), Mokokchung na longjemer March 13 nü JMC Hall nung Digital Awareness Camp ka takok ngua agiogo.

Digital banking service tem dak sendakba nung tangazükba agütsüsü aser kaketshirtem aser senso tajungtem dang digital inyakyim tajungtem indang sayutsü nükjidong nung iba sentong ayongzüka agiogo.

Iba sentong nung Branch Manager, Alongmen Branch, Mokokchung Imtitoshi SBI nung shisalen sayur liasü, aser pai bank-i agütsüba digital banking service balala indang tangazükba agütsü. Pai, SBI

indang digital sabangtem amshiba tajanzük aser koda tayong iba indang rasa ashi aser kaketshirtem dang secure digital transaction amshitsü ajungshi.

Paisa, digital fraud aser cyber scam tem tali kümyonga aoba indang sentong nung shilem agirtem nem tekümdangtsü metetdaksü. Pai, pei jurila banking indang osangtem kümzüka ayutsü, temulung melemi bilemba link aser call tem nungi pila alitsü aser online banking service tem amshiba mapang kanga kümmdangtsü koda tongtiba iba indang lemsatop.

Iba session ya lisopurtem kodaser digital safety inyakyimtem benshia tashioktsüba balala nungi jenboa litettsü, iba dak rangloker agia

liasü. Sentong ya Dr Chubaienla Imchen, Assistant Professor and HoD, Department of Economics, lenistüba nung agi, shiba sensaksem ajak achayanga liasü.

Sentong kübok sensaksem sentong ka agi, kong kaketshirtemi shilem agia digital banking aser cybersecurity dak sendakba nung tasüngdangba balala asüngdangba den ken o mejangjai alibatem asüngdanga liasü.

Iba awareness camp yagi kaketshirtem kanga ajanzükdaksüogo aser parnok nem digital financial service tem tali tajungba angatettsü aser online ajanga tsütatepba mapang kümmdangshia inyaksangshitsü asoshi ken o tajungba angatetdaksüogo.

Nagaland Angh-i North East Youth Festival lapoktsütsü

Dimapur, Metsüremi/March 14 (TYO): Nagaland Angh Nand Kishore Yadav-i, 9buba North East Youth Festival 2025-26 lapoktsütsü, koba Chumoukedima nung March 18 nungi 21 tashi agitsü lir.

Iba benjung nung North East nung aliba state tem nungi shilem agirtem aser ketdangsürtem 1200 shi adenshitsu.

Benjung ya "Ashtalakshmi: Celebrating

Eight Forces of Youth and Progress," omen nung ajemdaker amungtsü, koba NE sobaliba takar aser lanurtem sempet benjungtsü aser kasa mapang nung telongjem adokdaksütsü nükjidong nung ayongzüka amunger.

Benjung amungba mapang sobaliba tetoktepba balala, sobaliba sayatem aser lanurtemi shilem agiba sentong balala ayongzüka agitsü.

1st Quarter National Lok Adalat nung ken o 384 bentetogo



Dimapur, Metsüremi/March 14 (TYO): Honibarnü state nung 1st Quarter National Lok Adalat agiba mapang ken o 384 bentettsüogo. Nagaland State Legal Services Authority (NSLSA) kübok District Legal Services Authorities (DSLAs) temi district headquarter tem nung bench 11 amenok, kong ken o 511 benoka liasü. Ajak senteper settlement amount ji sen 47537148.00 (Four Crore Seventy-Five lakhs thirty seven thousand one hundred forty Eight Rupees only.) liasü.

Longleng DLSA-i District Court Complex nung 1st Quarter National Lok Adalat ayongzüka agiba mapang ken o asem benok aser asemprongla bentetja liasü. Settlement amount sen 6,97,389 liasü. Chief Judicial Magistrate-cum-Secretary Shri Kumdilong Kessen, NJS Presiding Officer liasü aser Retainer Lawyer K. Bongyei Phom, Deputy LADC Monyei Phom, aser Panel Lawyer L. Yingloi Phom na conciliators liasü.

Phek nunga Presiding officer Duvelu Vero, District & Sessions Judge cum Chairperson Phek DLSA-i anir conciliator Vethothi Vero Chief LADC, Thukutalu Chizo Panel Lawyer Phek DLSA aser Thomeweu Panel Lawyer Phek DLSA nungeri ken o 51 benokba ajak bentettsüogo. Settlement amount sen 93,07,049 liasü.

Chief Judicial Magistrate cum Secretary Smti. Holika Sukhalu, NJS-i anir Kiphire DLSA-ia, ken o 31 asadang aser ken o 11 bentetja liasü. Settlement amount sen 3,26,047 liasü.

Maneni Kohima nung mezüngbuba National Lok Adalat ya District Court Complex, Kohima nung agi, kong pre-litigation ken o 17 aser pending trial MACT 2 ana aser Money Suit ka benok aser ajak takok ngua bentettsüogo. Kohima nung settlement amount

ajak agi sen 22,04,927 liasü. Mon nung presiding officer Wokono Yhoshii Chief Judicial Magistrate cum Secretary DLSA Mon-i anir pre litigation bank recovery ken o 13 aser litigation ken o ka benok aser 11 bentettsüogo. Settlement amount sen 58,59,268 liasü.

Mokokchung DLSA-ia 1st Quarter National Lok Adalat ya District Court Complex nung ayongzüka agiogo. Chief Judicial Magistrate cum Secretary Julian Sithlou, NJS presiding officer liasü. Ajak senteper pre litigation bank recovery ken o 15 benok aser ajak bentettsüogo. Settlement amount ajak agi sen 33,49,633 liasü.

Maneni Wokha District Legal Services Authority (WDLA)-i Pre-Litigation - Bank recovery ken o pongu asadang aser ajak bentettsüogo. Settlement amount sen 8,57,561 liasü

Zunheboto nung Sessions Judge cum Chairman ZDLA Phuleto Yepth, NJS-i anir ken o 12 asadanga ajak bentetja liasü. Settlement amount ajak agi sen 14,81,608 liasü.

1st Quarterly National Lok Adalat kübok Tuensang District Legal Services Authority-ia bank recovery ken o 14 asadang aser bank ken o pongu bentettsüogo aser settlement amount ajak agi sen 7,99,500 liasü.

Honibarnüsa Peren nunga National Lok Adalat agiogo, kong SBI, Jalukie Branch aser Nagaland State Co-operative Bank, Jalukie natia shilem agia liasü. Ajak senteper pre litigation bank ken o 200 benok aser ken o 110 bentettsüogo aser settlement amount ajak agi sen 48,71,500 liasü.

Dimapur DLSA-i, District Court complex nung NLA sitting ayongzüka agi, kong ken o 146 benok aser ken o 141 bentettsüogo. Settlement amount ya ajak agi 1,65,12,665.00 liasü.

Pelaba Lemsateper

Late T.Aienla Jamir Chuchuyimlang
22nd Dec 1951-24th Feb 2026

Onoki teti abayua aser meima aliba ojala asür Mrs T. Aienla Jamir, 24th Feb 2026 anogo nung Kibuba Kidangi jar or onok azüngmeyaka aliba mapang kwikati onok mulung süngzükja sarasadem, rongsen, nebu, agi yaritepogo nenok shia dang pelaba metetdaksür.

Talisa Ojala shiranga aliba tepiyong temeimertem aikati rongsen tenla den, sarasadem, nebu agi yaritepbatemto onok mulungjang nung teti züngoka alitsü. Nenok temeim tulu ajanga asür doksüba ronem khrista sentsüwangshi asoshi abensadaksüogo. Asen Tulusang Tsüngremi nenok ajak moatsütsü aji ozü sarasadem.

Temeim kinungbu, chirnurtem, anükapang, semchirtem aser kinungertem.



"Ni asoshi takum alibaji khrista, aser tasütsüji tajangzük lir"

Filipi 1:21

Kolkata nung TMC aser BJP nung inyakertem tsüngda rara adok

Kolkata, Metsüremi/March 14 (Agencies): Honibarnü Ato kilonser Narendra Modi-i Kolkata nung aliba Brigade Parade Ground nung ayongzükba sentong ka nung jembitsü mapang tatsüka dang lia Kolkata nung BJP nung inyakertem aser Trinamool Congress (TMC) nung inyakertem tsüngda rara adok.

Ano Girish Park area nunga BJP nung inyakertem kari West Bengal minister Shashi Panja'er kidang lung onlokja liasü.

BJP sentong agitsü aliba tesem nungi kilometer 5 shi pilar aliba tesem nung rara adok. BJP nung inyakertem sentong nung adentsü atema Brigade Parade Ground tsütsüleni aoba mapang nung TMC nung inyakertem den rara adok.

West Bengal nung assembly election agitsü mapang ana nung

lia BJP-i state tesem ajaklen 'Parivartan Yatra' agia aruba sülen tanü Brigade Parade Ground nung tembangogo.

Tenük kuli alirtemi ashiba agi, BJP nung inyakertem aser TMC nung inyakertem tsüngda yimiyim ayima lung agi ontepa liasü.

Iba tensa aziüoktsü merangba mapang nung Bowbazar police station nung officer-in-charge, Bappaditya Naskar bo kanga mejungi yiruogo.

Kasa tatalokba nung North Kolkata district BJP Tir Tamaghno Ghosh yirua hospital-i anir ao. Pa densema party nung inyakertema aika yiruogo.

BJP lenirtemi ashiba agi, BJP pusemertem iba sentong nung adentsü aoba mapang nung TMC nung inyakertem tama lung onlokja liasü.

Ajisüaka TMC nung inyakertemibo, BJP

pusemertem tama Minister Panja'er ki amak, ta ashi.

Panja-i, "BJP pusemertem ozü kidang lung onloktsüba ajanga kichiba raksa. Brigade rally nung adentsü atema aoba bus aika nung lungru, glass pongdang aser bomb liasü. Parnoki Girish Park main road nungi ozü ki raksatsü," ta metetdaksü.

Laisa, iba tesem nung "Boycott BJP" ta zülua aliba posters BJP nung inyakertem shizüka indoktsüba nungi rara adok, ta metetdaksü.

Tesülen police iba tesem jagi aoba sülen tensa aziüokteta liasü.

Honibarnü Brigade Parade Ground nung ayongzükba sentong nungji Ato kilonser Modi-i sen crore 18,680 jenjang terenlok project aika tenzüksüogo.

Punjab nung BJP sorkar arura anti conversion ozüng benoktsü: Amit Shah

Moga (Punjab), March 14 (Agencies): Honibarnü Union Home Minister Amit Shah-i, 2027 küm Punjab assembly election nung BJP sorkari takok ngua sorkar tentetra yimsü meyipba nokdangtsü atema ozüng ka benoktsü, ta metetdaksü.

Punjab kübok Moga nung "Badlav" (temelenshi) rally nung jembidang Shah-i, Punjab nung tamangba yimsü melenba tebilemtsü lir, ta metetdaksü.

"Tang Punjab tesem ajaklen yimsü meyipba tebilemtsü onük lir. Ni Hindu nung aser Sikh nung adianutem ajak dang ya ashir, nenoki yangi BJP sorkar arudaktsüra onoki yimsü meyipba nokdangtsü atema ozüng ka benoktsü," ta pai metetdaksü.

"Congress aser Aam Aadmi Party (AAP) nati iba tebilemtsü ya meteta ali asü?" ta Bharatiya Janata Party (BJP) lenirisa

metetdaksü. Vote bank atema item party tem jagi yimsü meyiptsü atema maongka agütsür, ta pai ashi.

Shah-i, 9buba Sikh guru, Tegh Bahadur-ia yimsü meyipba nokdangtsü atema pa taküm bendanga agütsü, ta ashi.

"Iba lima nungi tanü ni ya ashir- Guru Tegh Bahadur mali asübo tanü India nung Hindu nung ka danga anünga melila," ta pai ashi.

"Guru Nanak Dev nungi tenzüka Guru Gobind Singh tashi ni tesayurtem ajak nem akhüm agütsür," ta pai ashi.

Tan ita tetenzüklen Mumbai nung jembidanga Union home minister Amit Shah-i Punjab nung yimsü meyipba tebilemtsü metetdakja liasü aser Punjab nung Chief Minister Bhagwant Mann-i aniba AAP sorkar dang 'merumeru' nung ajemdaker iba ama inyaksangshi anenang, ta metetdakja liasü.



March 14, 2026 nü Madurai nung Madurai Airport ya 'International airport' ta sangdongba sentong nung Union Civil Aviation Minister, Kinjarapu Rammohan Naidu-i jembidang tangokba noksa nung angur.

Centre-i climate activist Sonam Wangchuk chioktsü telemtetba agi

New Delhi, March 14 (Agencies): Honibarnü Centre sorkari climate activist, Sonam Wangchuk chioktsü atema telemtetba agiogo.

Yaküm Ladakh nung longkak aita tensa raksaba nung ajemdaker National Security Act (NSA) kübok pa apuba sülen pa ita trok jungnüa tepuokdak liasü.

Sorkari sangdong ka ajanga, NSA kübok aliba tashi amshia iba telemtetba agi, ta metetdaksü.

Tensa aziüoktsü nükjidong

nung yaküm September 26, 2025 nü Leh nung district magistrate-i Wangchuk pua liasü.

September 24, 2025 nü Leh nung Ladakh atema state jenjang takhangba agütsüba den külemi linük temzüng kübok Sixth Schedule nung züngoktsü takhangba agüja longkak aيتدang rara adokba sülen Wangchuk apu aser Jodhpur nung aliba jail ka nung puoka liasü.

Sorkari sangdong ka ajanga, ketdangsertem Ladakh nung

aliba stakeholders aser lenirtem aika den jembishinüba sülen iba telemtetba agi, ta metetdaksü.

"Ladakh nung yimjung aser tesünep alitsü, iba denji külemi stakeholders ajak den ken o jembitetsüsa tensa tajungba akümtsü asoshi onoki inyaksü," ta sangdong nung shia lir.

Centre-isa, iba region nung ken o ajak bentetsü atema High-Powered Committee ka tentetsü aser tanga sabang balala nung ken o jembitsü, ta metetdaksü.

Bengal nung arem yimsüsüba tatembang kati arutsü: PM Modi

Kolkata, March 14 (Agencies): Honibarnü Kolkata nung Ato kilonser Narendra Modi-i West Bengal nung Trinamool Congress (TMC) sorkar aija, Bengal nung arem yimsüsüba ya tatembang kati arutsü, ta metetdaksü.

West Bengal nung BJP-i sorkar akümtsü, ta Bengal tesem ajaklen jembidar, ta pai ashi.

Kolkata nung aliba Brigade Parade Ground nung lokti senden ka nung jembidang Modi-i, Trinamool Congress sorkar dak taochi mali aser TMC-i ozüng alema inyakba atema parnok dang tai matoktsü, ta ashi.


"Bengal nung arem yimsüsüba benokertem tatembang kati arutsü mapang tenzükogo. Bengal nung ozüng kübok yimsüsütsü atema anogo ana nung lir. Ozüng alema inyakertem dang tai matoktsü aser TMC-i ozüng alema inyakba atema parnok dang tai matoktsü. Iba sorkar yagi komaka merangyonga

temelenshi yipruji parnoki menokdangtetsü. BJP-NDA den Maa Durga lir," ta pai ashi.

Modi-isa, iba sentong nung medendaktsütsü atema Trinamool Congress sorkari asalentong yanglur inyak, ajisüaka yangi nisung jenti adenshia lir, ta ashi.

"Tanü-a taochi maketba sorkari iba sentong nokdangtsü atema parnok meyong hadir ajak amshiogo. Nenok iba tesem yagi marudaktsütsü atema apu shibang, garitem nokdang, BJP wako atsütetsü aser posters shizüka indoktsü. Ajisüaka taochi maketba sorkar, ya repringang- tanü lokti tulu ya nenoki menokdangtet," ta pai ashi.

"Bengal nung arem yimsüsüba anentsü. Ibayongji tangbo Bengal nung BJP sorkar arutsü, ta Bengal tesem ajaklen ola ka angashir. Bengal nung temelenshi arutsüji jaratem nung zülua lir aser Bengal nüburtem melungjang nunga zülua lir," ta paisa metetdaksü.



March 14, 2026 nü Patna nung Patna High Court nung Chief Justice, Sangam Kumar Sahoo-i ketdangsüa Syed Ata Hasnain (ajichi) nem Bihar Angh tenangzükba agidaktsüdang tangokba noksa nung angur.



TIR YIMYIM YIMOBILEM (EDITRIAL)

DIMAPUR SUNDAY, FEBRUARY (METSUREMI) 15, 2026

Ain nung inyakerkem

Tsüngrem yimlji o jembiba nung masü saka ain nung lir ta 1 Korint 4:20 nung shia lir. Iba Lai tekong nung shia aliba Tsüngrem o ya tanü tensa asenok dak kanga petpeter ta bilemer. Asenok ajaki Tsüngrem temeim indang jembir saka jembiba ama asenoki melitetter. Asenok aikati Tsüngrem mapa inyaker aser kanga junga sayutsüngir saka Tsüngrem ain adenba temaitsü kecha mangur. Aji oda, Khristan taküm ya mapa tulu inyaksü bilemba dang masü mesüra mezümeküma aliba purtema masü saka Khristan takümji Tsüngrem tashi aser ain nung alir. Tenyar Paul Tsüngrem tanüla temeshi agi sünger ain nung sayutsüngia jajaba mapang, Korint nung alirtem kari pa sayutsüngiba aitsü aser parnoki sayutsüngibaji dang shitak ta amangba purtem mesüzüksü kanga meranga jajaa liasü. Ajisüaka, Paul sayutsüngia jajaba den pa anemertemi sayutsüngibaji medemdangra kenyongi tepila talangka liasü. Paul-i ain nung sayutsüngi saka pa anemertem dak tanüla temeshi ain maliasü. Ibayongji, Paul-isa Korint 10:10 nung pa anemertemi pa indang majung jembitsüba ajanga amangba purtem memetsüdaksü aser mashileni maotsü atema tekümanngtsü o kar ashidang, karibo pai shiti tajung aser sashisashia züluaka, pa dak tashimait aika lir aser pai takitsü o mejembir ta jembitsür, ajisüaka Tsüngrem yimlji o kija junga jembiba agi masü saka ain agi inyakba ajanga dang angatetter ta shia angutsü. Tenyar Paul ajanga nisung aika temulung meyipa Yisu dak amangdaksü aser arogo tenzükyong ao. Pai shiranger jungtsü aser tasür a shia arudaksü. Pa anemertemi ashi ama, Tenyar Paul-ji o jembiba nung tsüngro masong asütsüa akok saka pai jembiba otem nungji Tsüngrem ain aser tashi dena liasü. Atangji, Tenyar Paul mapang Korint nung sayutsüngia jajar amaji, tanüla Tsüngrem yimli indang sayutsüngia jajar asenoki aika ajurutsüa akok. Parnok jagi o kanga junga jembitsü akok. Parnok jagi asenok dang alima tesem balala nung atalokba indang tejangja bener arua ashitsüa akok. Ajisüaka, tagitsüabajibo parnoki jembiba nungji Tsüngrem ain dena ali asü mali aser parnok taküm nung tanüla temeshi tashi ali asü mali ta asübaji asütsü. Nisung karibo Laishiba nung aluba o kanga junga jembitsüa akok saka pai jembiba ama pa taküm melitetra, pai jembiba oji ain maketba o aser pa takümji tazüngla taküm asütsü. Nisung kari Tsüngrem ain aser tashi indang jembitsüa akok saka pa taküm nung Tsüngrem ain aser tashi agi akokba kuli melira, pa oji takidak makaba o akümtsü. Takokba Khristan taküm ka alitsü asoshi jembitsübo kanga temela saka mapa agi inyaka sayutsübo kanga tasak lir. Asenok rongnunga 2 Timoti 3:5 nung shia aliba ama, " temeshibamesüka beshir saka iba tashi ainbo mali," ta lia lira, Tsüngrem tsüngdang asenok temenen nangzüksüla aser tanüla temeshi agi süngjang ta ashitsüla. Idangji dang asenok taküm nung Tsüngrem ain aser tashi adentsü.

OLEMSABANG

TANÜ PUTU NUNGLANUR KA TAKÜM SENTI MAPANG DEN PA/LA TAKÜM RAKSABA

~ Bendangnaro Jamir

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Awashi samaba iba ya asenok meimchir takum ka den atisha jembir. Awashi ta kodang sudir asen libaliru, jembishinu, inyaksangshi, yimya, jakla ajak densema lir. Awashi memetetra meimchir kaji tasuba den. Saku ta zungshir. Kechiyong awashi ajanga da pa/laji kechi koma nisung ajak meteter. Awashi ka metetba ajanga tanar kin den a jungtepteter. Awashi ta kodang sudir nisung takum arakzuka awa oa inyakba dang ajar. Awashi temai jungkai adokba kar yamai. Jembishinu tain kar kiboksemi arudang menden agutsua suingo, peka asungdang renema agutsuba aser lokti mapa inyakdand kati ka matatepi pei akok meranga inyakba aser pei dand tainba dang akhumtsubua jayajokoba aser tain nem menden azunga agutsuba. Chi chiyongdang tain nem tama anepalua anganuba aser tain mesura nisung kar khu taret bener alidang agizuka yariterpba abenba tain O jembidang O raktepba mejembi Yamala ajanga awashi tajungji jungkai adoker. Awashi tajung amshitepba tajung adokdaksu. Ano Talisa bendanger kin dang awashi tajung sayutetbaji asenok asoshi tesendaktu tajung yangerlutep kechiyong asenoki a angur tangar kin asenok naga nung masurtem tzumar parnoki nisung sur alidaki kangabo maor aser shiranga alidang semdangsemrer malir kiyong kidanger den mejembiteper titem mapang melemsateper saka asaenok naga kinbo shirangdang pei akok yari bendener semdang, tasu tama nung taka yia amoka yariteper aser kiyong kidanger den a kinunger dang nungi tajungba yaritepa alitsu meranger. Awashi tajungji jungkai adokba yamaji yariteper.

Ano awashi tamajung beshibaji kin ka asoshi maksu aser iba nisungji tasuba den saku ta zungshir yimya awashi tamajung jungkai adokba kar yamai. Tangar jembishinu dang pi dang ashi metet ta jembir tangar shianga zungoka maliba yimya amshir tangar kidang arudang pi takdang nungi temai madoki O agi dand jembir yokba mesura lokti mapa nung pi ajungdang asa inyakba aser azumesenba Yamala yimya tamajung ajanga tangar jashidaksur. Tanu putu nung itemji kanga sashia adoker onok kibong kati atu class 10 (ter) nung takok angur jabaso alidak par kidang onok pezu atu anakji sarasadem agutsui aoba saka tebu aser tetsu na mena liasu par jabasoji pa takdang phone nung game sayaya liasu saka anak kibong tangai aotsuba liasu anungji tarutsu anogo asoshi Tsungrem dang temoatsu meshia sarasademtsudi ta jembir pa Tsuraburi jabasoji aja saka pai takdang nung jaki matok tetsui anaben tashi pa takdang tashi wa aja saka pai matok anungji onoki sarasadema yutsur aruadok. Saka aji item tatalokbaji asenoki Tsurabur tai kechiyong pa/lai mangatet dang nungi. Tsuraburi parnok indang phoneji pa nem aguja tanur asudang nungji amshidaksu tangbo paji artsua sayubentsu agutsu nung tanubusangji dang tesashiba ta lir. Ano ibaji dang masu dang news nung sashia adokbaji tanur phone amshiba ajanga tekolok nung kongshia Doctor balala dangi aoba osang kakat nunga angur.

Kibong nung sarasadema aniba tanur ka takumji tazukba nung alir. Ano kibong aika nung tsuraburi tanurji Tsungrem O nung anitetba angur. Asenoki kodang tanur ka den medemer amai mesui parnok tebilemba aser tejangraba memeteti Tsungrem O nung anitsu merangba. Asenoki parnok O mangai asen teinyaktsuji ta bilemer kangashia sarasadem nung anioka Tsungrem O ajanga alentsu meranga ibaji asenok shisa maka sayur. Tanur kaji pa/la tejangraba asendanga kibong nung saisalemsa kati ka agatetba nungji lenmang tajung aika adoker kodang tanur kaji asenoki parnok mangatet sur kodang kangshia Tsungrem O aser sayubentsu nung alendir parnoki asenok dang meima inyaksu tenzaker aser parnok lendong tuluka matalok tashi asenoki memeteter. Saka parnok den kodang parnok shisatsu aser tibelemba angateta shisa lemsaba den aseni parnokji Tsiungrem O nung dang aniba masu saka asenoki inyaka sayudir asenok parnok den mali nunga parnoki kanga angateta takumji lia ao.

Tatishitsu kar ajanga asenoki yamai medemdangtsu akok. Tsungremi pa sasa maparen ajak kokteta aser inyaktetta dang saka pai nutsungtem aser Tanidakertem anidena maparen ajak inyaka ao kechiyong kulemi inyakba nung tangazukba aser temoatsu lir ta. Tsungrem maparen ajanga angateter yamaji tanur ka takum alima nun glia aodang tsurabur den kulemi otsula obula kinunger ajak den kibok semtepa aser kati ka shisalemba nung tarutsu nukla tajungba dang masu saka tanur ka takum jenjang tajungba nung ajungketer.

Anungji nisung ka takumji loktiliba nung alinung dang tajung, majung ajak ajangshidang asen shisatsu arener aser iba ajanga asen oki kumdasnger. Tanur ka mezung tangazukdakji kibong ya lir. Anungji kidang kibong nung tim tazukba nung kodang tanurji tain kumdir kima yimdong nung tim awashi amshiba ajanga tsurabur aser tanurji akum keta repringer. Akumtsubu kecha rongsen agi alizuktsu makok saka tim awashi aser shisa taka ningsungi dang item ya angur.

Putu melenshiba yari nisung shisatsuren aser azung ashi nunga kanga temabai aor saka kibong aika nung pei tetsu oshi mejembitetba aser mezulutetba ajangshir ibaji asen Aor jenjang tekuboleni aoba temaitu tulutiba lir. Kechiyong tetsu oshi mezulutetba aser mejembitetbaji maktsu dang masu saka asen senti rongsen ka samaba lir. Anungji dang amai tetoktepba yimya balala akaba ajanga lanur tejangrar ano ika adoka aotsu yimlar.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Odisha nung Khristan kibong 30 Tenla ki telungi meidaktsür



Odisha state nung Nabarangpur district kübok Kopena yimdak Khristan tainlonglong ka asüdak Khristanem adenshia aliba noksa nung angur.

Bhubaneswar, March 14 (Agencies): Odisha state nung Nabarangpur district kübok Kopena yimdak Khristan kibong 30 Tenla kidangi meidaktsür, ta osang ka ajanga metetdaksü.

Kasa yimdak tainlonglong Khristan ka asüba sülen tasü mangji aremtsü memela.

Iba yimdak Khristanemi, "Akhidang nungi onoki iba Tenla kidang tekülem sentong aser sarasadem sentongtem agia arur, ajisüaka tangbo yimdaklirtemi onok Tenla ki telungi meidaktsür," ta metetdaksü.

Taoba ita tomle arrshi küm 13 tebur Khristan, Ayush Santa tezüngjang aser temesen dak

sendakba tashidak agi asüba sülen par kibongi Khristan asüpila sentong agia yimdak leper nung aremtsü merang, ajisüaka yimdaklirtemi tasü mangji meremdaksü.

Iba sülen yimdaklirtem aser Khristanem na tsüngda mangatetep bentetsüsa atema sorkar ketdangsertem ishika yimdak jagi yoka liasü.

Tesüsa tasü mangji nija li nung aremtsü aser mang aremba tesem nungji Khristan yimsü dak sendakba nung asüpila sentong magiba den Kangki mayutsü par kibong nem nangzükdaktsüba sülen ang tasü mangji remdaksü.

Odisha kübok tribal yimtsüng

aika nung yimdaklirtemi Khristanem tasü mang aremtsü memelar. Khristan yimsü toktsü nung ang tasü mangji aremtsü melatsü ta ashir.

Nabarangpur nung ketdangsertem yimdaklirtem aser Khristanem dang tensa meraksatsü metetdaksüba den külemi yimdak yimsü balala amangertem atema leper temeja lemsütsüsa, ta tuyuogo.

Yimsü temeden atema inyakertem, tasü mang aremtsü atema ajak nem temeden agütsüsa asoshi state sorkartem aser Centre sorkari tiyongtsü ia inyaktsüla, ta mepishia metetdaksüogo.

Nepal nung Khristanemi sorkar tasenba dak teimla akar

March 14, 2026: March 5, 2026 nü Nepal nung general election agiba osang Khristanemi kanga yongyaa ataogo; linük nung Khristanem aikati sorkar tasenba ajanga tamangba yimsü temeden akhümtsübutüsü aser Khristanem densema nütsüng ajema alirtem nem security agütsüsa imlar.

Nepal nung anti conversion ozüng kübok Khristanemi timtem aika ajangshia arur aser mapang shia tanga yimsü alia amangertem Khristanem anema inyaker.

Iba ama tensa mapang ka

nung March 5 nü Nepal nung general elections agiogo.

First-past-the-post (FPTP) system kübok vote zünga Rashtriya Swatantra Party-i menden aika nung takok anguba sülen parnoki sorkar akümtsü.

International Christian Concern (ICC) den jembidang pastor Tamang-i, "Election osang ya imlaba ama masü aser teratatsü lir, ajisüaka Hindu nationalist party tem jenjang tamajungba kümogo, anungji Khristanemi sorkar tasenba dak teimla akar," ta metetdaksü.

Ano Khristan katibo, "Tang sorkar tasenba kübok Khristanemi ano timtem taliba ajangshitsüa akok," ta metetdaksü.

Ano lanur Khristan katibo, "Asen linük nung sorkar tasen melenba atema Khristan ajaki pelateptsüla. Iba election ya oshimashi den mapa manguba tebilemtsü aser Hindu yimli ka tentetsü na tsüngda tetoktepa ka liasü. Ajisüaka nüburtemi ochimashirtem sendokogo aser temelenshi adoktsüsa inyaktsüpurtem aser ozüng shidak benoktsüpurtem shimogo," ta metetdaksü.

Nicaragua nung ketdangsertem putirtem ordination nokdang

March 14, 2026: Nicaragua sorkari Khristan putirtem aser deacon tasenpurtem ordination nokdangogo, aser ibaji ajanga Jinotega, Siuna, Matagalpa aser Estelí territories nung aliba Arogotem aika kongshitsü, ta Arogo nung lenirtemi metetdaksü.

Nicaragua nung ketdangsertem tang iba ozüng tasen benokba ajanga theological training renemba lanurtemi Arogotem nung metenzüktetsü.

Ordination ketdangsa agitsü atema bishops nem

temelaba magütsür, aser iba ya linük nung Arogo samatsütsü nükjidong nung inyakba kuli sayur.

Nicaragua Tir Daniel Ortega aser pa kinüngtsü Rosario Murillo na yimsüsa kübok tesüba küm aika Arogo anema tenokdangba balala benoka arudar.

Nicaragua nung Interior Ministry-i melungtet telok 1,500 dak tali anentsüogo aser item telok teimbaka Evangelical Arogotem aser missions indang melungtet teloktem lir.

Sorkar ketdangsertem denominations aser independent ministries aika dak tenük yoka repranger aser tashiyim amshia Christian radio aser television stations aika shibangtsüogo.

2018 küm iba linük nung nüburtemi sorkar anema longkak aitba mapang nung teyari balala agütsüba ajanga pastor temi linük anema inyakogo, ta pastor aika nem tai tongloktsüba sülen nungi sorkari Arogo anema inyaker aser pastor tem-a aikati linük toktsür jenogo.

ANO GO ABEN TSÜNGREM DEN

AZÜMESEN ASER TERAKSA TESENTAKTEP

Pei mapa nung anialemerji, teraksa den adianu - Apijemtsü shin 18:9

Iba Lai o ajanga ashir, azümesenba ajanga nisung ka ka ta ashitsüji tera tali tapong jembir ama, saka ibai ochi a taküm kechi koda takoksai anir aor. Azümesenerji teraksar lir.

Azümesenba indang jembidang, asenoki aiben nisung kar mapang shitak nung mapa meinyakba mesüra oda mapa ta asübaji khenyongi meinyakba indang noksa asen nuklai arur. Saka iba ajanga takoksa bener arutsübaji atamata masü Tatishitsü agi; aluyimer kadi par alu anepalu mesüi azümesena kazüra, aih agi tsük amokseptsü, shirurui chiungtsü chitsütsü, aser ajak samatsü. Iba yagi aluyimer taküm dang masü, saka par kibong aser par alu nung metaloker aliba kibong aika raksatsür. Azümesenba ajanga nisung ka taküm dang masü, saka lokti dena raksatsür. Kechi nung südir süaka, kodang asen mapatem mapang shitak nung asenoki meinyaklir, iba jagi lokti dena menendaktsür. Office nunga nisung kadi pa/la shilem shitak meinyakba ajanga telok ajak nem teraksa bener arudaktsür.

Laishiba jagi asenok meranga inyaka alitsü indang ajungshir. Aseni kechi inyaker, aser ibaji ajanga tangar taküm koda kongshir, ibaji kanga junga bilemdangtsü ayongzüker. Azümesenba nem asen mokokdaktsüba ajanga asen sempet tali jangjadaktsür aser asenok meketa aliba adianu asoshi tajangzük bener arur.

SARASADEM:

Tsüngrem ni akok tashi azümesenba kü taküm madak Kibur mekümdaktsütsü ni ne dang nangzüker. Amen.

'The Ten Commandments' film küm 70 ajunger



March 14, 2026: Küm 70 tejaklen 1956 küm sayaba "The Ten Commandments" film küm 70 ajungba nungtem nung Süia aoba benjung/Easter season mapang nung United States nung aliba theatres aika nung iba film sayatsü.

Iba film nung Charlton Heston-i Mosa shilem aser Yul Brynner-i Pharaoh shilem agia lir. Iba film ya Tsüngremi Israel nungertem Egypt lima nungi anitetba otsü film lir.

Ghonda 3 ser minute 39 talang film ya par mapang nungbo kanga nungtugu film rongnung ka liasü.

Iba film ya nungtugu filmmaker Cecil B. DeMille-i yanglu aser iba film ajanga US box office nung dollar sen million 65 dak tali ajangzükteta

lian. Tanübo sen million 65 ji dollar sen billion 1 jungnüa lir. Golden Ticket Cinemas-i, "Küm 70 ajungbamong ya Retro Rewind den senteper monga March 31 - April 2 nung screen tulu nung sayutsü," ta metetdaksü.

Iba film sayaba sülen 2021 küm iba film küm 65 ajungba mapang nung Paramount Home Entertainment-i iba film ya 4K version nung sayaa liasü.

'The Ten Commandments' film ya April 4, 2026 nü aonung 7:00 ako nungi TV nung ABC ajanga repringtetsü.

Iba film ya streaming services- Amazon Prime, Apple TV aser Fandango nunga repringtetsü.

AO OSHI ANGAZÜKDAK:

TANÜ ANGAZÜKTSÜBA OJANG



Waitsü

(n) jang merüktettsü atema tapok keta atakba molok (winnowing tray, loosely woven straining basket) * Tamburtemi yong agi waitsü aika atak.

Wajak

(adj) tejaklen ajaki angutsüsa aliba (front side) * Aikati lokti senden nung wajak bushia amener.

OLONG PAITEP # 7444

15x15 crossword grid with numbers 1-17 indicating starting positions for words.

TIPLÉN

- 1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

- 1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijilba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 7443 TELANGZÜBA

TIPLÉN :

- 3. Auya, 5. Tekoro, 7. Yong, 8. Mata, 10. Asen, 11. Anentsü, 12. Lisü, 13. Ak-ki, 15. Ajak, 17. Indang, 18. Okar.

LANGTSÜNGLEN :

- 1. Atema, 2. Komo, 3. Aong, 4. Yongsük, 6. Tsüngi, 7. Yanü, 8. Molung, 9. Tasazük, 10. Asak, 14. Kanga, 15. Apir.

NAI-A YA METETTER



Arishi küm 4 tain Merlin the Pig ajanga Guinness World Records ka yanglutetogo aser iba ya "most followers on Instagram for a pig" atema lir.

Mina Alali-i March 2022 nung Merlin the Pig adopt asü aser ita asem asü dang nungi training agütsütsü tenzük. February 23, 2026 tashi nung Instagram nung Merlin the Pig indang 1.1 million followers liasü aser iba jagi Guinness Book of World Records-i iba naroküm agütsü.

Kaliabor-Numaligarh highway project inyaktsü rakteper



Guwahati, March 14, 2026

(Agencies): Kaziranga ajanga 85.6-km Kaliabor-Numaligarh highway project atema National Highways Authority of India (NHAI) tsüngdang bids 18 aruogo.

Iba mapatong ya taküm financial year nung NH-715 ajungkettsüba nung shilem ka lir aser Rs 6,956 crore shi endoktsü.

Iba mapatong ya Cabinet Committee on Economic Affairs ajanga mulunga Assam nung connectivity tajungba akümtsü aser Kaziranga National Park and

Tiger Reserve nung arem shiruru senzusenbongba nung timtem kanga magütsütsü.

January 2026 nung Prime Minister Modi-i iba mapatong atema bhumi puja süogo.

Iba mapatong nung tongti shilem kaji 34.5-km Kaziranga Elevated Corridor lir aser iba ajanga Kaziranga aser Karbi Anglong hills tsüngda arem shirurutem senzusenbongba nung timtem magütsütsü.

Iba highway upgrade ajanga NH-715 nung Kaliabor-Numaligarh stretch two lanes nungi four lanes akümtsü.

Iba mapatong nungsa greenfield bypasses ana dena

lir aser itemji Nagaon district nung Jakhlabandha aser Golaghat district nung Bokakhat nung lir.

Maneni, vehicular underpasses 5, light vehicular underpasses 12 aser service roads kilometer 16 shi yanglutsü.

Iba mapatong ya Wildlife Institute of India, National Tiger Conservation Authority aser Assam forest department nunger den asüngdangtepa yanglu ta ketdangsurtemi ashi. Maneni, National Board for Wildlife-ia iba mapatong mulunga agizükogo ta parnokisa shisem.

CBI-i Rs 16,000 süpokrem atema SBI ketdangsur ka apu

Guwahati, March 14, 2026

(Agencies): Central Bureau of Investigation (CBI)-i State Bank of India (SBI) nung Assistant Manager aser Loan Officer ka puogo.

Iba ketdangsur Assam kübok Kamrup (Rural) district nung loan

applications atema Rs 16,000 süpokrem meshia agiba atema apu.

Iba ken o ya March 12, 2026 nü benok. Bank ketdangsur rooftop solar systems enoktsü atema loan applications atema

Rs 16,000 meshir ta osang sangoktsü ta CBI-i ashi.

Iba ken o nung ajemdaker CBI-i ketdangsur aputsü atema tasa ka atong aser pai süpokrem meshia agidang apu.

SBI ketdangsurji Special Judge, CBI, Guwahati Court-i anir oa ken o benokogo ta ketdangsurtemi ashi.

Manipur Governor-i national integration tour aoertem pelaa agizük



Imphal, March 14, 2026

(Agencies): Manipur Governor Ajay Kumar Bhalla-i Hokolbarnü national integration tour nung shilem agirtem pelashishia agizük.

Iba tour ajanga shisatsü tasen angur, linük longjemshir aser lanurtem dang parnoki ajangshibatem külem medemsortem den lemsateptsü ajungmesor ta Governor Bhalla-i ashi.

Taoba hopta Governor Bhalla aser pa kinungtsü nati New Keithelmanbi Garrison nung HQ 9 Sector Assam Rifles semdanga liasü aser idangji Manipur nungi lanur 24

adenba telok ka anogo 10 nü national integration tour atema apusoa yoka liasü.

Iba telok yagi Thiruvananthapuram, Kanniyakumari, Mumbai aser Kolkata sema senzü. Parnokisa Kerala Governor Rajendra Vishwanath Arlekar den ajurutepa sensaksemtsü maongka angu.

Iba tour nung ajangshibatem ajanga shilem agirtemi loktiliba asoshi tajung inyaktsü aser 2047 tashi nung developed India mangdang atema inyaktsü imlar ta Governor Bhalla-i ashi.

Paisa shilem agirtem dang linük longjemtsü aser putepa

alitsü osang prokshitsü ayongzük.

Iba tour nung adenertemi parnoki ajangshibatem lemsatet aser Assam Rifles-i exposure visit ayongzükba atema pelaba metetdaktü.

'Ek Bharat Shreshtha Bharat' tangatetba akangshitsü aser shilem agirtem nem linük nung sobaliba temeyoktep, senmang aser technology tsütsü tejakleni aoba ajangshidaktütsü atema iba tour ayongzüka agi.

Brigadier Pratyush Kumar, DIG, 9 Sector Assam Rifles-i Governor Bhalla pelashishia agizük.

Iran kübok Kurdistan tesem nung nisung 110 dak tema tepset

Tehran, Metsüremi/March 14 (Agencies): United States aser Israel nati Iran kübok Kurdistan province amakba sülen tang tashi nung nisung 112 tepsetogo, ta local ketdangsürtemi ashiba state media sangdong ka ajanga metetdaksü.

Kasa mapang nung Washington-i arrtsü adener Iraq nung aliba Iranian Kurdish force tem dang ali ajanga Iran amaktsü ajungshiba osang angazükogo.

Kurdistan Provincial Emergency Department tekolakbai Hokolbarnü ashiba agi, iba tesem amakba mapang nisung 969 yirugogo.

Nisung 27 tang mozükidang temang anepaludar aser nisung pongu intensive care unit tem nung yua lir, ta ketdangsür yagisa metetdaksü.

Kurds nungertem ya Mesopotamian nung lisourtem lir, shrinok nütsünyongzük agi ajema lir. Parnok ya southeastern Turkiye, northeastern Syria, northern Iraq nung semi-autonomous Kurdish region, northwestern Iran aser southwestern Armenia nung alir. Parnok oshi aser sobaliba ka dang saka parnok meyong state temeja ka maka.

Kasa mapang nung parnok ya Iran nung nütsünyongzük shilem 10 shi asütsü ta bilemer, saka official zünyga mali.

Iranian aser Iraqi Kurdish teloktem den tir Donald Trump indang idanga sensaksemadar aser Washington-i ali nung parnok military tashi ya amshitsü meranger ta osang adoker aliba mapang US aser Israel nati Iran kübok Kurdistan province ya makdar.

Ajisüaka taoba hopta Trump-i ashiba agi, pai Kurds nungertem nem Iran memakdaksüner aser US-i iba rara ya tebenjaba mekümdaksüner.

Iran nung Kurdish opposition movement tem shirnok Iraq nung Kurdish nung teloktem den

kanga junga sendaktepa lir, parnoki Iran-Iraq arrtsü len northern Iraq nung amendaker Tehran anema inyaksangshia arudar. Item teloktem ajak senteper sepai meyirejang aika alitsü ta amanger.

Taoba hopta Iran nunger sepaitemi kidanger Iraq nung parnok indang semi-autonomous region nung Kurdish teloktem anema meita aoba sentong ka benoka liasü.

Iraqi Kurdish regional sorkari, Kurdish nung teloktem Iran-i yoktsü kecha tebilemba mali ta shiogo.

Kasa mapang nung Iraq yimtiba Baghdad nung United States Embassy missile ka agi maka liasü, ta ketdangsürtemi metetdaksü.

Iraq indang security source kati Al Jazeera dang Honibarnü ashiba agi, missile yagi air defence system shilem ka raksatsü. Ajisüaka source-i iba dak alaka tanga osang tejangja magütsü.

Baghdad nung US Embassy telung nung missile kati helipad raksatsü, ta security ketdangsür anati Associated Press news agency dang ashi.

Iba missile ya Green Zone nung embassy amenoka aliba tesem nung tsük. Green Zone ya Baghdad teyongtsü nung Iraq sorkar office aser bendanga embassy balala amenoka aliba tesem ka lir koba mitkartemi kanga sashi sashia nüka alir, ta security ketdangsür ana yagi shisem.

Ken o dak sendakba nung Baghdad nung US Embassy nungi kecha telangzüba magütsü.

Social media amshirtemi lemsatepba video tem nung iba missile khaloktsüba sülen embassy amendaka aliba tesem nungi kokozü adokba nguogo.

Al Jazeera osangbener Mahmoud Abdelwahed-i Baghdad nungi ashiba agi, missile agi amakba sülen nisung asü

asü masü mesüra koba tashi raksatsü iba indang osang tejangja memetet.

"Ajisüaka Iraq nung Iran den sendaktepa aliba teloktemi US nung indang facility tem aser talisa embassy amaktsü nangzükogo," ta pai ashiba den parnoki Ayatollah Ali Khamenei mang yangner, shiba parnok kinungertem den külemi rara tenzükba mapang tepsetogo.

"Parnoki yashi linük nung US diplomatic personnel tem indang osang agütsürtem nem senpet USD 100,000 agütsütsü nangzükogo," ta osangbenerisa metetdaksü.

Rara tenzükba sülen tang agi tanabenbuba Baghdad nung US Embassy ya makogo.

Hokolbarnü embassy-i Iraq atema parnoki indang Level 4 security yanglushiogo. Iran aser Iran den sendaktepa aliba teloktemi taoba mapanga US nungertem, parnok tejangraba aser infrastructure tem makogo aser maneni amaktsü akok ta tekümdangtsü metetdakja liasü.

Iraq nung US indang embassy ya alima nung US diplomatic facility tulutiba rongnung ka lir aser iba tesem ya taoba mapanga drone aser rocket tem agi makogo.

Tehran-i teyari agütsüba teloktem ya Iraq nung Islamic Resistance ta nungja agütsür umbrella movement ka kübok inyaksangshir aser parnoki drone aser rocket amshia iba tesem nung US nung tamendakdak balala amakba nangzükogo.

Rara tenzükba sülen Iraq nung item teloktem nungi züngsemtem amakba ya US aser Israel dak tai tonglokja aruogo.

Iran-i teyari agütsüba Kataib Hezbollah telok mapang balala nung anaben maka tongtibang lenir ka densema züngsem ana tepsetba sülen Honibarnü embassy ya maka liasü, ta security source temi AFP news agency dang ashi.

MOLUNGNEN O



08.03.2026

"Ni rara tajungji raraogo, ni alizung tonga asemogo, ni tamangji yuogo." 2 Timoti 4:7

Ojala **Punala Ao**, Teti taküm aliba Kidangi aoba anogo nung shirnokisa Sarasadem, nübu, rongsen aser tesüneptsüba ola ajanga, onok süneptsüoko, ajak dang ozü kinungeri temulungjang ajak agi pelaba, iba molungnen O ajanga lemsateper.

Asüko mapang nung nenok ajanga ozü molungjang süneptsüa, onok iba taku mapang tepiyong, tashi agütsüoko. O agi onok pelaba abensa meshiteter, saka asen teyanglur Tsüngremi nenok teti moatsütsü onok sarasadem.

-Temeim Kinungbo, chirnurtem, semchirtem aser kinungertem.

OFFICE OF THE LONGMISA SENSO MUNG DANG

P.O MOKOKCHUNG - 798601 B.P.O LONGMISA
MOKOKCHUNG : NAGALAND

TENÜNGSANG AGÜTSÜR



IMSENWATILA PONGEN



TAJUNGNUKSUNG PONGEN

Longmisa Senso Mungdang ajanga tenüngsanga takok tajung angur nem konang tetushi agütsür.

1. **Imsenwatila Pongen** (D/O Mr.Limawapang Pongen & Mrs. Alemnungla Jamir) First Rank (Gold Medal) in Master of Science in Zoology 2023-2025 Batch from St. Joseph University Chümoukedima, Nagaland.

2. **Tajungnuksung Pongen** (S/O Late Tsuknungmangyang & Mrs Pangernungla.) Junior Engineer (Class-II Gazetted) Under Public Health Engineering Department NPSC 2026

Teyanglur Tsüngremi taküm tajung den tarutsü anogotem nunga temoatsü nung len ania moajangma.

Sd/-
Pangersosang,
President LSM.

Sd/-
I Senkanungba Ao,
G.Secretary LSM.

North Korea-i ballistic missile ishika tendangogo



Seoul, Metsüremi/March 14 (Agencies): United States aser South Korea nunger sepaitem annual military exercise agiba mapang North Korea-i linük antölen tzüküm nungi missile tem aika khaketa yokogo, ta Japan aser South Korea defence force temi metetdaksü.

Japan indang Ministry of Defence-i Honibarnü ashiba agi, missile tem ya 1:34pm local mapang (04:34 GMT) nung northeastern leni khaketa yoka liasü.

Missile tem ya anüngleni km 80 yimketa atuba sülen kilometer 349 yima or Korean Penin-

sula anütoklen aser Tokyo indang exclusive economic zone temalen tzüym nung tsüka liasü, ta Japan-isa metetdaksü.

Osang ajanga ashiba agi, iba missile tendangba mapang anasa yimzüba tayimtsü mesüra rongtem dak mekongshi, ta kasa sangdong ajangsa

metetdaksü.

South Korea indang Joint Chiefs of Staff-i ashiba agi, Pyongyang-i anütoklen tzüym koba dang Sea of Japan ta ajar iba tesem leni ballistic missiles 10 shi khaketa yoka liasü, ta Yonhap News Agency-i metetdaksü.

JCS-i ashiba agi, taküm küm tenzük North Korea-i tang agi tasembenbuba ballistic missile tem tendangogo. South Korea, Japan aser US nunger sepaitem kanga kümküma atadar, ta iba news agency yagi metetdaksü.

Pyongyang-i kidangertem dang mepelaba temaitsü aiben missile aser tanga projectile tem khaketa yoka arudar.

US aser Israel nati Iran maka Tehran-ia meyiper tesem balala amakba ajanga Middle East nung tang mepetmesü adoker aliba mapang Honibarnü

North-i item missile tem khaketa yokogo.

South Korea aser US nati anogo 10 atema Freedom Shield exercise benoka inyakba atema North-i iba hopta tetenzüklen iba inyakyim ya anemogo.

Iba hopta tetenzüklen North Korea-i naval destroyer tasen ka nungi cruise missile tem khaketa yoka liasü.

US tir Donald Trump-i Kim den senden amentsü merangtsü akok ta bilemba mapang ka nung tang ballistic missile tem ya tendangogo. Lenir ana ya Trump mezüngbuba tir inyakba mapang senden mena liasü, ajisüaka kecha tajangzük maliasü. Tena asemben ajurutepogo. Tena tatemesa 2019 küm ajurutep aser iba mapang lenir ana yagi Korean Peninsula lemdangba Demilitarized Zone semdanga liasü.

Indian Wells: Sabalenka aser Rybakina na final asayatsü



Sabalenka & Rybakina

Metsüremi/March 14, 2026

(Agencies): Tang asaya aliba Indian Wells asayamung nung Aryna Sabalenka-i Hokolbarnü Linda Noskova koka Australian Open champion Elena Rybakina den final asayatsü.

Semifinal asaya nung Sabalenka-i Czech tsür Noskova 6-3, 6-4 agi akok aser Rybakina-i Ukraine tsür Elina Svitolina 7-5, 6-4 agi koka tena final asayatsü jangjaogo, koba Australia Open final asayashiba ama asütsü.

Rybakina-isa 2023 küm Indian Wells nung Sabalenka koker lir. Indian Wells nung Sabalenka anaben tashi final tonga asayaogo, saka khen

danga mekoki lir.

Ajisüaka Sabalenka takümbo iba asayamung nung kanga junga asayadar.

Semifinal nung lai winners 37 angu aser ace 11 oteta asaya aser baseline nungi Noskova tanen makai nongshia asaya liasü.

Mezüngbuba set nung lai Czech tsürla indang serve ya anaben tashi break asü aser la 5-1 agi tejakdang aküm aser asaya ayong ayonga akok.

Tanabuba set nunga mezüngbuba game nung Sabalenka-i Noskova indang serve break süa liasü. Noskova-i break point ka kümzüktet, saka game tibuba

nung Sabalenka indang serve ka break asütsü maongka anguba magiteti tanabuba set-a makok.

Kasa mapang nung Rybakina, shiba Hombarnü world number 2 jenjangi atutsü lir, laia Svitolina kanga meranga asayar kokogo, shibai quarter-finals nung Iga Swiatek tsükdakja liasü.

Rybakina-i mezüngbuba set nung Svitolina indang serve ka break süa lai asaya 7-5 agi akok.

Tanabuba set nungbo Rybakina-i Svitolina indang serve anaben tashi break süa la 4-0 agi tejakdang aküm aser iba sülen asaya ya 6-4 agi koka liasü.

PSL melena IPL shimba atema PCB-i Muzarabani amokmeren

Metsüremi/March 14, 2026

(Agencies): Zimbabwe nung fast bowler Blessing Muzarabani-i Pakistan Super League nung asayatsü atema tenangzüktepba yanglur aliba melena Indian Premier League nung Kolkata Knight Riders nung asayatsü shimba atema pa anema temzüng ozüng dak ajemdaker jenjang agitsü Pakistan Cricket Board tebilemba lir, ta osang ajanga metetdaksüogo.

Kolkata Knight Riders puri Mustafizur melena Muzarabani alizüka liasü. Mustafizur Rahman ya Board of Control for Cricket in India-i tetuyuba agütsüba sülen team nungi tugudaksü. Muzarabani shiba pa indang height aser bounce atema kanga nüngtugu lir, pa KKR puri taruba season nung par team pace attack akangshitsü atema yakta dang alizüka liasü.

Ajisüaka iba jenjang agiba ajanga PCB mepela, kechiyong Muzarabani ya taruba PSL season nung Islamabad United nungi asayatsü atema PKR million 11 agi alizüker liasü.

Geo Super sangdong ka ajanga ashiba agi, IPL nung

asayatsü maongka agütsüba sülen Zimbabwe nung asayar yagi PSL nung masayatsü telemtetba agi, koba tenangzüktepba anema jenjang agiba ka ama PCB-i züngshir. PSL contract tem kümzüka ayutsü aser tarutsü nung iba amala tia majangshitsü asoshi board-i temzüng ozüng dak ajemdaker jenjang agitsü asadangdar.

Asayar dak sendakba nung IPL aser PSL na tang mezüngbuba mangatettep adoker masü. Taoba season-a South Africa nung pacer Corbin Bosch Peshawar Zalmi puri shim, saka pai Mumbai Indians nungi asayatsü shima liasü.

Indian Premier League ya alima ajunga nung kanga nüngtugu aser takar league ka lir aser iba ajanga alima ajunga nungi international asayar tajungtibatem atsüa arur. Asayartem aikati Pakistan Super League nung asayatsü melena IPL nung asayaner, kechiyong league ana tsüngda senotsü aazüktsü asoshi tebandang tulu lir aser broadcasting nunga tebandang tulu adoker.

Abrar alizükba atema Sunrisers Leeds pur taittsüba aika ajangshidar



Abrar

Metsüremi/March 14, 2026

(Agencies): India nung meyong Hundred franchise Sunrisers Leeds puri iba hopta Pakistan nung spinner alizükba atema social media nung taittsüba aika ajangshidar.

India aser Pakistan na yimden yimsüsüba tsütsü mangatettep adoker aliba ajanga linük ana ya international asayamungtem nung dang asayar.

Pakistan nung cricket asayartem 2009 küm nungi Indian Premier League (IPL) nunga masayar, kechiyong linük ana tsüngda tesendaktep mejungi lir.

Iba hopta Hundred atema

mezüngbuba auction nung IPL den sendaktepa aliba club temi Pakistan nung asayartem atema bid masütsü akok ta imla liasü.

Iba asayamung atema franchise pezü- MI London, Manchester Super Giants, Sunrisers Leeds aser Southern Brave ya shilem ka bo IPL team temi azioka aliba company tem meyong lir.

Ajisüaka Sunrisers, shirnok Leeds yimti nung amenoka lir, parnoki Pakistan nung leg-spinner Abrar 190,000 pounds agi alizüka liasü.

Abrar alizükba osang sangdongba sülen nisung meyirejang aikati India nung kiburtem aitsü tenzüka liasü.

Karibo 2025 küm May ita linük ana tsüngda mangatettep adokba sülen Abrar-i social media nung India tilutsüba tuteta ashi aser fan tem dang IPL club Sunrisers Hyderabad pur pu masemtsü ayongzüka liasü.

Iba auction nung Pakistan nung asayartem rongnung Usman Tariq dang Birmingham Phoenix puri alizüka liasü.

Bodhbarnü tetsür auction nung Pakistan tsür Fatima Sana aser Sadia Iqbal na liasü, saka tenaprongla malizük.

England aser Wales Cricket Board-i taoba ita sangdong ka ajanga, club tipronglai asayar ka pa asayaba yimya dak dang ajemdaker alizüktsü asoshi bendanga agütsür lir ta shia laisü.

Ajisüaka Ahmed alizükba atema Sunrisers pur ya India nung cricket fan temi kanga mejungi aitsüdar.

X nung @SunrisersLeeds account ya Brehostibarnü suspend sütsü. Iba sülen Hokolbarnü ano follower tasen anisemer account lapokshi, saka comment tem ya Abrar alizükba dak dang timba rangloker liasü.

Yamaji cub indang Instagram feed-a taittsüba agi asüng aser Sunrisers Hyderabad indang account tema ajak iba onük agi sünga aküm.

Dravid, Binny na nem Lifetime Achievement Award agütsütsü

Metsüremi/March 14,

2026 (Agencies): Board of Control for Cricket In India (BCCI)-i sangdong ka ajanga Rahul Dravid aser Roger Binny na nem March 15 nü Naman Awards agütsüba mapang Col CK Nayudu Lifetime Achievement Award agütsütsü ta metetdaksüogo.

BCCI-isa, tetsürtem rongnung Mithali Raj nema Lifetime Achievement Award agütsütsü, ta sangdongogo, shibai India nung tetsürtem cricket asayar renloka aoba nung teyari tulu agütsüogo. Iba naroküm ya BCCI indang Naman awards sentong nung agütsütsü.

Rahul Dravid ya linük nung nüngtugu cricket asayartem rongnung ka lir. Küm ter dak tema linük tenzüka mapang pai format ajak nung run 24000 yanglua liasü. Asaya nungi anisüngzüka sülen Dravid ya coaching-i meyip aser India A aser U19 team tem den inyaka India nung cricket asaya tashi itshidaksü. Iba

sülen pa 2022 nungi 2024 küm tashi India team coach mapa inyaker aser iba mapang team-i ODI World Cup 2023 aser T20 World Cup 2024 koka liasü.

Kasa mapang nung Binny ya 1983 küm World Cup akokba India team nung liasü. Iba asayamung nung pai wicket timba agia team teyari tulu agütsü. Pa ya 2000 World Cup nung India U19 team coach liasü aser parnoki iba asayamung akok. Pa 2012 küm nungi 2016 küm tashi national selector liasü aser pai asayar aika anitetogo. Maneni pa ya 2022 nungi 2025 tashi BCCI tir liasü.

Maneni award agütsüba sentong nung Shubman Gill nem 2024-25 season atema Polly Umrigar Award for Best International Cricketer (Men) naroküm agütsütsü. Pai iba naroküm ya tang agi tanabenbuba agizüktsü lir.

Ano Smriti Mandhana nem la indang career nung tang agi pongubenbuba Best International Cricketer (Women) naroküm agütsütsü.

BILEMDANGANG

"Nai kechi inyaker aji meima inyakang."